

20/10/2001

Sektor domestik jana ekonomi 2002

Dr Mahathir Mohamad

NEGARA kita telah pulih daripada krisis kewangan Asia 1997/1998 dengan mencatat pertumbuhan ekonomi yang kukuh selama dua tahun berturut-turut pada 1999 dan 2000. Bagaimanapun, usaha gigih kita untuk mengekal momentum pertumbuhan yang dikecapi telah terjejas sejak awal tahun ini berikutan kelembapan luar jangkaan ekonomi global, terutamanya di Amerika Syarikat dan Jepun.

Serangan ke atas Amerika Syarikat pada 11 September telah memburukkan lagi keadaan ekonomi global. Selepas saja serangan itu, kita menyaksikan pasaran ekuiti utama dunia menjunam - sesetengahnya ke paras yang belum pernah berlaku sebelum ini. Dengan kemungkinan ekonomi Amerika Syarikat akan mengalami kemelesetan dan kesan buruknya menular ke seluruh dunia, impaknya akan memburukkan lagi keadaan di Malaysia.

Kesan daripada kelembapan ekonomi Amerika Syarikat sebelum 11 September menyebabkan pertumbuhan Keluaran Dalam Negeri Kasar (KDNK) merosot daripada 3.1 peratus pada suku pertama kepada 0.5 peratus pada suku kedua 2001, selepas pertumbuhan kukuh selama tujuh suku tahun berturut-turut.

Kemerosotan ini adalah prestasi paling buruk semenjak pemulihan ekonomi. Kita telah menyemak semula unjuran pertumbuhan ekonomi sebanyak dua kali. Semakan pertama dibuat pada Mac yang mana anggaran pertumbuhan dipinda daripada tujuh peratus dalam Belanjawan 2001 kepada antara lima dan enam peratus. Kini pertumbuhan ekonomi negara dijangka merosot kepada satu hingga dua peratus setelah mengambil kira perkembangan terbaru di Amerika Syarikat.

Perkembangan ekonomi global yang semakin menurun bermula ketika negara baru memasuki tahun pertama Rangka Rancangan Jangka Panjang Ketiga (RRJP3) 2001-2010 serta permulaan bagi Rancangan Malaysia Kelapan (RMK-8), 2001-2005. Kita tidak harus membiarkan masalah yang dialami pada masa kini menjejaskan misi kita untuk mencapai Wawasan 2020 bagi menjadikan Malaysia sebuah negara maju.

Justeru, kita harus berusaha mencari dan melancar pendekatan yang khusus dengan penuh semangat dan tekad untuk meningkatkan lagi daya tahan dan daya saing negara dalam menghadapi segala cabaran yang mendatang.

Meskipun persekitaran luaran kian sukar, asas ekonomi makro negara masih kukuh, hasil daripada pendekatan dasar kerajaan yang pragmatik serta pengurusan ekonomi yang fleksibel. Akaun semasa imbalan pembayaran terus mencatat lebihan yang kukuh sejak 1998. Rizab antarabangsa adalah stabil pada tahap yang lebih tinggi, iaitu AS\$29.7 bilion, yang mampu membiayai 4.6 bulan import tertangguh atau 6.2 kali liabiliti jangka pendek negara. Hutang luar negara juga terus rendah.

Keadaan inflasi masih terkawal. Sistem perbankan semakin kukuh sementara kadar ringgit yang tetap terus menyediakan persekitaran yang stabil untuk menggalakkan aktiviti ekonomi. Sesuatu yang harus meyakinkan kita akan kebaikan penetapan tukaran asing oleh kerajaan ialah ringgit diterima pada nilai yang ditetapkan semua pihak dan tiada pasaran gelap untuk ringgit.

Malaysia bernasib baik kerana mempunyai struktur ekonomi yang lebih pelbagai, atau diversified. Walaupun eksport dan pelaburan langsung asing di sektor pekilangan membantu menyumbang kepada pertumbuhan, negara tidak semata-mata bergantung kepada industri elektronik untuk memacu pertumbuhan. Asas sektor pekilangan kita kini lebih luas.

Langkah juga akan diambil untuk memajukan lagi sektor pertanian sebagai sumber pertumbuhan ketiga. Selain itu, ekonomi negara akan maju ke arah

aktiviti berasaskan pengetahuan sebagai sumber pertumbuhan baru. Dalam hubungan ini, Koridor Raya Multimedia (MSC) meletakkan asas bagi membawa negara ke arah k-ekonomi.

Pertumbuhan bagi 2002 akan lebih dijana oleh sektor domestik melalui peningkatan penggunaan dan pelaburan, sementara sektor luar dijangka bertambah baik menjelang penghujung tahun depan. Kerajaan akan bertindak tegas untuk melaksanakan langkah yang perlu bagi memperkukuhkan lagi permintaan dalam negeri.

Di samping itu, kerajaan juga akan mengekalkan persekitaran sesuai bagi memudahkan aktiviti perniagaan dan menarik pelaburan dari sumber dalam negeri. Sektor swasta pula perlu berusaha dan terus memainkan fungsi sebagai jentera pertumbuhan demi membantu usaha kerajaan untuk mencapai matlamat pertumbuhan negara.

Meskipun kelembapan ekonomi global mungkin berpanjangan dan mendalam, kita yakin dapat mencapai pertumbuhan yang mapan berdasarkan asas ekonomi yang telah dibina kukuh di samping pelbagai strategi dan langkah yang telah dan akan diambil. Dalam menempuhi persekitaran yang mencabar ini, komitmen dan kesetiaan rakyat adalah amat penting bagi menyokong inisiatif kerajaan untuk mencapai matlamat pembangunan negara. Sokongan rakyat yang tidak berbelah-bagi seperti yang telah ditunjukkan ketika krisis kewangan lalu sekali lagi akan membantu kita menempuhi suasana yang mencabar.

Laporan Ekonomi ini menyediakan penilaian prestasi bagi tahun 2001 serta prospek untuk tahun depan. Laporan ini juga membincangkan isu dan cabaran yang dihadapi dalam pengurusan ekonomi serta bentuk dasar yang dilaksanakan kerajaan.

Rakyat Malaysia perlu terus bersatu padu, bertekad serta berusaha lebih gigih untuk merencanakan lagi aktiviti ekonomi dalam negeri. Seperti pada masa-masa lalu, sokongan jitu dan keazaman rakyat yang teguh akan membolehkan kita mengharungi rintangan dan halangan untuk muncul lebih kukuh dan membina masa depan yang lebih gemilang untuk semua rakyat Malaysia.